

(海陸腔)

【露營】 徐秀英原作

舊年放避暑个時節，阿爸講愛渡佢兜去露營。這下全臺灣露營个場所有當多，佢兜共下討論當多擺，最尾選定一隻在半山排、交通還算利便、種有榮榮大樹个露營地。一想著總算做得暫時掉忒都市个吵鬧、掉忒課本个自在，做得摺大自然接近个好機會，佢斯開始期待接受山林个招喚。

露營个前一站仔，佢兜斯開始各各去準備愛用著个物品。像帳篷、睡袋、煮食个傢伙，食个、用个項項都愛準備齊全。阿哥還帶等佢這恁久無離手个吉他，老弟帶象棋，阿爸帶釣槓，大家都想在這兩日徹底放空。佢摺阿姆當驚晒烏，大大緣个帽仔、防晒个面油、美白个面膜，一項都無少帶。該日打早，佢兜興喋喋仔駛車出發，路町个風景當靚，青山綠水、鳥語花香分人心情越發鬆爽。

半晝邊仔，佢兜就到露營地咧！阿爸指揮大家在較平个空地紮營，經過點過鐘个七手八腳，總算搭好兩隻帳篷。阿姆在樹下个爐頂煮一大鑊泡麵，裡背有肉、有卵、有青菜、還有各式各樣个丸仔，單淨看著、鼻著，斯緊流口水咧！一家人在郊外个第一餐斯食到肚圓圓仔，佢摸等肚屎燙在樹身下，涼風輕輕仔吹來，

毋多知斯睡忒咧。老弟擲著一截狗尾草鑽佢个鼻空，佢一嚇醒，佢就走到尾瀉屎，在闊闊个草坪，佢兩儕又翻又碾，歸身搞到烏疏滴落。看阿爸拿等錫桶摺釣槓，佢兜又好擲擲仔跔在佢後背，去到坑脣，緊緊跳落水窟肚，浸等冰涼个山坑水，在熱燻燻个天時黏時透心涼。

一直到日頭會落山咧，佢兜還等有半錫桶个魚仔，搖搖擺擺轉到營地，大家共下動手準備暗餐。阿哥起火焙肉、阿姆煮湯，佢摺老弟排碗箸，阿爸打𠂔𠂔。在暗摸摸又恬靜个天地之間，佢兜坐在火堆脣打鬥四、聽阿哥彈琴、講天南地北。

分風吹停動个火光，映照在大家帶等笑容个面町，又溫暖又幸福，也係佢最難忘个一擺回憶。